

日本藏中國罕見

地方志

叢刊續編

北京圖書館出版社

殷夢霞

選編

日本藏中國罕見

地方志

叢刊續編

第 12 冊

北京圖書館出版社

肇慶府新志序

觀于天文其日月星辰乎
觀于人文其文章政事乎
至若大地山川草木鳥獸
蟲魚井而有辨亦燁而

宣顧不曰文而曰理乃
凡隸厚載之上皆待理於
人者也得其理而高深夷
嶮隨文命以誕敷否則無
論物類乖爭屯蒙晦塞將

流峙失序陵谷代遷與泡
影同歸漸滅矣溯鴻荒以
前逮千載而下天柱靡傾
地紀恒互關係于文章政
事者豈其微哉百粵爲嶺

海奧區堯宅南交舜標韶
石禹碑岫嶺周通百蠻自
王跡之旣熄而此土遂棄
爲荒獷我

聖祖洗兵甲于南溟指黎岐

爲奇旬維時歸命豪傑若
何東莞李尚書咸以版籍
輸誠自此東西數千里濯
舊取新卽融結動植皆覆
需雲而耀晉日矣端州居

東粵上游襟喉八桂百年
來文武總師移鎮弭節封
疆錫繡稱樞轂焉迹其因
革建置實百粵理亂之所
窾繫頃予奉

簡書飭兵于此入其疆而
山川滂如也土俗郁如也
人文蔚如也所謂別有天
地耶復索隼乘而披之彰
往范來所爲政事文章莫

不燦然犁具攷厥撰輯則
經始於前太守攜李味道
陸公蒐潤于孝廉區啓圖
懷瑞諸君比陸公鶯遷而
陳俶闡太守至始竣其事

余于兩太守雖未及傾蓋
而曾從輦上交啓圖乃其
書該博典麗綱舉目張擷
靈葩幽采於墳典丘索史
傳稗野中總總林林亦復

彪彪韡韡遂令山川委會
與人物互相映發了不異
宛委之藏也巳邇者纂修
實錄會典咸徵文獻於四
方而每見郡邑諸乘非燕

雜繇紛則珪殘璧斷求其
若粵東之辛丑通志鮮矣
况能如茲乘之富有日新
七十禩而三梓輯哉夫端
州本衝疲羸師帥長下車

問俗必按舊章繇是規之
矩之以法以戒其造福當
未有涯矣予益信人之政
事文章麗地成文地之文
卽地所爲志也因弁諸首

簡而訂其錯簡如千篇訛
漏如千字俾丁乾初司李
一一授工改正是志也陸
公肇之陳公成之予不佞
從而更端繙定焉庶幾無

缺陷之憾而有資乎後之
徵信者矣

崇禎庚辰歲閏上元日

欽差整飭兵備分巡嶺西

道廣東按察司僉事前

南京吏部考功司郎中
 行人司行人如臯冒起
 宗撰于道署之郤硯齋

